

18 NOV 2000

Umno-Tutup

PERSIDANGAN KHAS UMNO DIJALANKAN SECARA TERTUTUP

KUALA LUMPUR, 18 Nov (Bernama) -- Perhimpunan Agung Khas Umno hari ini bagi meminda perlembagaan parti dijalankan secara tertutup di Dewan Merdeka, Pusat Perdagangan Dunia Putra (PWTC) di sini.

Ini merupakan pertama kali Perhimpunan Agung Umno dilangsungkan dengan hanya dihadiri perwakilan dan pemerhati.

Beratus-ratus wartawan termasuk media asing, tidak berpeluang mengikuti sesi perbahasan dalam Dewan atau menerusi televisyen litar tertutup seperti yang dinikmati pada perhimpunan-perhimpunan agung yang lepas.

Begitu jugalah halnya dengan beratus-ratus anggota parti itu yang berkumpul di ruang legar PWTC untuk menyaksikan perbahasan mengenai cadangan-cadangan pindaan perlembagaan parti yang dikemukakan oleh Majlis Tertinggi.

Bagaimanapun peti-peti tv litar tertutup yang dipasang di pusat media dan ruang legar dewan persidangan menyiarkan kembali rakaman ucapan-ucapan Perdana Menteri dan Presiden Umno Datuk Seri Dr Mahathir Mohamad pada perhimpunan-perhimpunan agung Umno yang lepas.

Setiausaha Agung Umno Tan Sri Khalil Yaakob ketika ditanya oleh media mengapa persidangan khas kali ini dijalankan secara tertutup berkata: "Kita memikirkan ini supaya perwakilan boleh berbahas secara lebih terbuka tanpa berasa dia disekat."

Sungguhpun perhimpunan itu berjalan secara tertutup, suasana di luar dewan persidangan tetap ceria dan meriah seperti perhimpunan-perhimpunan agung Umno yang lepas.

Anggota-anggota parti bukan perwakilan yang berpakaian baju Melayu lengkap bersamping dan berbaju kurung merah putih kelihatan berlegar-legar di sekitar tempat persidangan.

Ruang legar PWTC dipenuhi pengusaha gerai-gerai sementara yang menawarkan makanan hinggakan pakaian. Seperti biasa gerai-gerai itu mendapat sambutan hangat.

-- BERNAMA

ZS ZS RHM